

AKASHVANI AIZAWL

REGIONAL NEWS BULLETIN

HEADLINES (MORNING)

1. Dec 3 a Lai Autonomous Dist Council inthlanpui neih turah Party hrang hrang hruaitu te Campaign in Lawngtlai lam ah an fehchhuak mek.
2. Education Minister Dr. Vanlalhlana'n nimin khan Champhaiah "Meet Your Minister" hun a hmang.
3. Assam Legislative Assembly chun nupui pakhat aia tam neih khapna dan Assam Prohibition of Polygamy Bill 2025 nimin khan a pass.
4. Prime Minister Narendra Modia chuan nuclear sector lamah sawrkar ni lo private te tan luh ve na remchang sawrkarin a siam chho mek a ti.



LADC

Dec 3 a Lai Autonomous Dist Council inthlanpui neih turah Party hrang hrang hruaitu te Campaign in Lawngtlai lam ah an fehchhuak mek a,

Lunglei tlawhtu District Council & Minority Affairs Minister Pu C Lalsawivunga chuan nimin khan ZPM Southern Headquarters Office Lunglei a tlawh a, a puala inkhawm buatsaihah thu sawiin, Lai Autonomous District Council inthlang tur chungchangah ZPM Party chuan theih tawp an chhuah mek a, an Party Candidate tur chungchang ah pawh fimkhur taka hmalakna nen kalpui ani a ti a, he Council ah hian ZPM Sorkar ala piang ve lova, chuvangin Lai District tan hmalakna leh hnathawh an la nei lo a. He inthlanna lo awm turah hian LADC huam chhunga mipuiten ZPM Sorkar a pian theih nan thawhpui se an duh tak zet a ti.

LADC hnuai inthlanna hnukung ber ah khan CEM panga (5) lai mai an nei hman a, a pawh hle a, Laifa ten an tuar hle a, hmasawna hrang hrangin a tuar a, hetiang thil hi a thlen tawhlohna turin tun inthlan hi a pawimawh tak zet a ti.

MNF Vice President Dr.R.Lalthangliana MLA chuan Lawngtlai Bazar Areopagy ah thusawiin, ZPM sawrkar ah District Council ten ngaihsak an hlawh lo ati.

Dr.R.Lalthangliana hian LADC General Election Campaign in Bial hrang hrang a tlawh kual a, Lawngtlai lut leh in, Tlai lamah Areopagy a Public Meeting an neihah thusawiin, Kum 1998-2003 chhung khan Minsiter anih laiin District Council enkawl turah tih ani a, khatih lai khan Council a thawkte hlawh pek theih loh an neih a hrelo ati a, ZPM sawrkar in District Council Sawrkar a namnul lutuk chu pawh a tih thu sawiin, Vawin thlenga Thawktute, MR thlengin hlawh pawh an pe theilo chu zahthlak atih thu a sawi a. District Council chu 6thScheduled hnuai ah mumal taka enkawl an nih thu sawiin, chu chu State Sawrkar pawhin a zahsak tur anih laiin, tuna ZPM sawrkar erawh chuan a pal bawrh bawrh lutuk che u hi a pawh a, Hetiang hi State Sawrkarin a enkawl dan tur che a ni lo a ti a, thawktu pawhin a hun takah hlawh an hmu zat zat tur a ni a, chu chu MNF Sawrkar lai pawha an kaldan ani a ti.

Dr.R.Lalthangliana chuan Dampa By-Election ah Chief Minister pawh a tang hle a, Vanlalsailova an hnawl chuan Lalduhawmaa hnawl tihna ani ang a, Vanlalsailova an Vote loh chuan amah an Vote lo aniang ti hiala sawiin, Dampa mipui ten Vanlalsailova kaltlangin Pu Lalduhawma chu an hnawl ta a, ZPM hian an term hi an hmang zo thei angem an thlir zel dawn ni a ti.

MPCC President Pu Lal Thanzara chuan Vaseikai-ah Lai District Congress Committee Conference a hmanpui a, thu sawiin LADC ah hian Party hrang hrangte an lo sawrkar tawh a. Congress ni lo Party dangte an sawrkar a piangin thiltitheite induhsak tawna ringawt a ni tih an hre tawh a ti a. District Council zahawmna te pawh tih bawrhban in a awm a. District Council-in zahawmna a neih let leh theihna turin Congress Party an sawrkar leh a ngai a ti. Party mala sorkar ngei an inbeisei a, an thei lo a nih pawhin Congress Party tel lo chuan District Council ah sorkar

thar a piang dawn lo a. Sorkar intawm alo piang ta a nih pawhin Congress chu an thawhpui Party te lakah rinawm dawn a. Sorkar ngialnghet siam an tum a ni, a ti.

Pu Lal Thanzara chuan, ZPM Sorkar ang reng reng a, Council sorkar hlam chhiahtu an la awm ngailo a ti a. Anmahni ZPM Party Worker tan pawh an harsatna puhru turin sum leh pai an nei lo a. Congress Party Sawrkar laia an mamawh puhruk a nih thin lai kha hre thar leh turin a duh a ti.

Kan candidate-te an chak ngei theihna tura theihtawp chhuah a hma lo la ve turin ka ngen che u a ni, tiin Congress leh Lairam mipuite MPCC President Pu Lal Thanzara chuan a sawm a ni.

<><><>

OIL PALM AWARENESS CAMPAIGN

Kolasib District Oilpalm Growers Society huaihawt in Thingdawl Chhimveng YMA Hall ah Oilpalm Awareness Campaign nimin khan neih a ni a, he hunah Kolasib District chhunga Tuichhuahen zau leh Chemlui zau a Oilpalm ching thar kuthnathawktu thahnem tak an kalkhawm.

He hun hi Kolasib District Oilpalm Growers Society Chairman Pu VL Dika Pachuau chuan a kaihruai a, Pu Lianhlunzauva, Block Agriculture Officer, Thingdawl Agri Block chuan thu sawiin, Oilpalm hi Central Scheme NMEOP hnuaiia kalpui a nih thu sawiin, he scheme atang hian Oilpalm chingtuten hamthatna an dawn theih hrang hrang te a tarlang a. Oilpalm chu a hralhna ah harsatna a awm loh thu a sawi bawk.

Godrej Agrovat Ltd, Senior Executive, Pu Lalruatkima chuan Oilpalm rate chu chawh rualin Kg ah Rs 16 vel a ni, a ti a, Oilpalm rah bawr khat man chu Rs 300 chunglam zel ani, a ti. Mizoram a Oilpalm kalpui tan tirh a, Oilpalm rate tha lo leh mi thenkhatin a thalo zawnga Oilpalm chanchin an sawi te chuan Oilpalm hmasawna kawngah hun rei tak harsatna an tawk tih a sawi a, tunah chuan mi tam takin Oilpalm chu eizawna atan inngahna tlak a nih zia an hrechiang tawh a, chuvangin, mi hausate pawhin Oilpalm huan siam an intih hmuh ani, a ti. Oilpalm ching duh te chu an huan leh ram en chian hmasak phawt hnu ah uluk taka zir chianna nen Oilpalm phun tir chauh anni thin a ti a, Oilpalm chu duh duhna hmuna chin a rem lo tih a sawi bawk.

(Andrew kolasib PTC)

<><><>

MEET YOUR MINISTER

Education Minister Dr. Vanlalhlana'n nimin khan Champhaiah "Meet Your Minister" hun hmangin School Headmaster thlan bikte training a hmanpui bakah Govt.Champhai College leh Govt.GMHSS a tlawh bawk.

Education Minister chuan sikul naupangte kawmin, zirlaite chu lehkhabu chhiar tam turin a fuih a, eng lehkhabu pawh an chhiar chuan thiamna leh finna an chhar chhuak zel a ni tih a hrih a.Taimakna leh tumruhna nen mahni kalna lam zir leh thiam tum a tul a, intihhlimna khawvelah rilru fim leh ngaihtuahna tha neih a tul thu a sawi a, social media pawh mahni hmasawn nana hmanh hram turin zirlaite chu a chah bawk a ni.

Minister hian thu a sawi zawh ah naupangte zawhna chhangin sawrkar policy chungchang te, Education Department thil tum hrang hrang te a sawifiah bawk.

Higher & Technical Education Minister ni bawk, Dr. Vanlalhlana chuan Govt. Champhai College tlawhin college leh DC Office tangkawpin civil services coaching class an lo buatsaih thin chu lawmawm a tih thu a sawi a, duhtusamin zirtirtu leh staff an nei lo tih a hriat thu sawiin theih ang angin tanpuina pek a tum thu a sawi a, chutih rual chuan theihtawp chhuaha zirlaite hamthatna ngaihtuahin taima taka zirtir zel turin a chah. Zirlai tha tak, ram kaihruaitu leh danglamna siamtu chher chhuak thei turin duhsakna a hlan bawk a ni.

Education Minister Dr. Vanlalhlana hian nimin vek khan Education Training Hall-ah "Post PRS (PARAKH Rashtriya Sarvekshan) District Level Dissemination and Training on HPC (Holistic Progress Card) for selected Primary School Headmasters and Teachers under Champhai District" chu a hawng a.

Hemi zawh hian Minister Dr. Vanlalhlana chuan Govt. GM Higher Secondary School leh District Education Office te a tlawh a, zirtirtute leh staff te hnenah fuihna thu a sawi bawk. Minister hian tunkar khan Khawzawl leh Champhai District a tlawh a, district zawng zawng a tlawh kimna a ni.

(Lahlupaia Champhai PTC)



INTACH LUNGLEI

Mizorama Indian National Trust for Art and Cultural Heritage (INTACH) chapter pahnihna, Lunglei Chapter chu Art & Culture Minister Pu C. Lalsawivungan nimin khan Lunglei Convention Centre-ah a hawng.

Pu C. Lalsawivunga chuan kum 1987-a din INTACH Mizoram Chapter zarah dan tha tak The Mizoram Ancient Monuments and Archaeological Sites & Remains Act 2001 neih phah a nih thu leh he dan tlawh chhan hian pi pu hmun hlui 81 lai chu State Protected Monument-ah puan a nih tawh thu te tar langin, Lunglei District lamah pawh Zosapte leh Sapho sulhnu te, pi pute sulhnu hlu tak takte chu humhalh zinga a tel thu a sawi a. INTACH hma laknain Mizoram State Protected Monument pathum – Kawtchhuah Ropui (Vangchhia), Ralven Puk (Vangchhia) leh Lungphun Ropui (Lianpui) te chu National Importance-ah puan a nih tawh thu leh Sawrkar laipui Ministry of Culture hnuai Archaeological Survey of India atangin a chei that nan tanpuina thahnem tak dawn a nih tawh thu te sawiin, INTACH chu ram rohlu leh pawimawhte humhalhtu ber a nih avangin Mizoram sawrkar pawhin a ngaih hlut a, a dah pawimawh thu te, Aizawl Pisapui kangah pawh INTACH duh ang chiaha sak that hna thawh mek a nih thu te a sawi.

Art & Culture Minister chuan Mizoram sawrkarin Mizo hnam tobul leh thlang tlak dan uluk zawka zir leh chhui chiang turin Chief Minister Pu Lalduhoma kaihhruaina hnuai 'Hnam Tobul Zawn Chhuah' Committee a din thu leh nasa taka hma lak tum a nih thu sawiin, INTACH Lunglei Chapter chu phungbawmah sawmin, sawrkar hma laknaa tawiam zel turin a ngen a. Lunglei District leh a piah chhim lam Mizoram chhunga Zo hnahtlak pi pute hmun pawimawh tak tak chu Lunglei Chapter chuan theih tawp chhuaha zawng chhuakin, Zoram mipui hriata pho chhuak turin hma la se a duh thu a sawi baw.

INTACH hi kum 1984 khan din niin, Delhi-ah hmunpui an neih bakah, India ram hmun hrang hrangah chapter 200 chuang an awm mek a. Tuna Chapter hawn thar Lunglei Chapter-ah hian member 40 awm mekin, Convener chu Rev. Dr F. Sangvela, Co-Convener: Pu K. Lalsanga, Secretary: Pu JC Vanlal Hmuaka, Treasurer: Pu ZH Ropuia te an ni.



POLLUTION

Mizoram Pollution Board chhinchhiah danin, kumin October thla a lirthei khu endik zat chu a vai a belkhawmin 8,354 a tling.

MPCB-a thawktuten Akashvani News Aizawl an hrilh danin, lirthei khu endik 8,354 zinga 77-te chuan endikna an paltlang zo lo va, lirthei khu endik zingah hian two wheeler tam berin 5,883 endik a ni. Kum 2024- 2025 sorkar tangka kum chhungin Mizoram pumah lirthei 72,097 endik a ni a, heng zingah hian lirthei 1,078 te chuan endikna an paltlang zo lo baw.

MPCB hotute sawi danin, lirthei khu endikna hi Aizawlah hmun nga MINECO, Hlimen, Rangvamual, Silaimual leh Zemabawkah te a awm a, Transport department hmalakna in Durtlanga Common Services Center awm chuan lirthei khu an endik theih thu leh Lunglei Lunglawn leh Rahsi Vengah te lirthei khu endikna hi bun a nih tawh thu an sawi baw.

Kan correspondent report i lo ngaithla ang :

Voice Cast :

(Corr)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



NEWS

Akashvani Aizawl Regional News Unit in Aizawl, Hnahtial, Chawngte, Vairengte leh Champhai North atana Part Time Correspondent a lak tur te interview hun chu Dec ni 3 khian neih

a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

(DESK)

<><><>

ASSAM

Assam Legislative Assembly chun nupui pakhat aia tam neih khapna dan Assam Prohibition of Polygamy Bill 2025 nimin khan a pass a. He bill hian a tum ber chu inneihnain a kentel mawhphurhna ti nghet tur leh hmeichhiate dikna chanvo venhimna tur a ni a. Ramchhunga polygamy khapna dan khauh ber nimin khan an pass a ni. He dan bawhchhiate chu kum 10 lung in tan thlenga hrem theih a ni ang..

(Newsonair)

<><><>

PM

Prime Minister Narendra Modia chuan nuclear sector lamah sawrkar ni lo private te tan luh ve na remchang sawrkarin a siam chho mek a ti. Nimina Skyroot Infinity Campus internet kaltlanga a hawnaah he thu hi sawiin Pu Modia chuan space sector lamah chuan private te tan luhchilhna remchang siam a ni tawh tih sawiin insiamthatna hi kalpui chhoh reng a ni a ti a. Prime Minister Narendra Modia chuan India space sector in nasa takin rampawn lam sumdawngte a hip tih a ti a. Pu Modia chuan sawrkarin space sector lama hmasawna turin insiamthatna kawng tam tak a neih thu a sawi a. Heng space sector ah hian mimal sudmawngte te leh startup te bakah Industry te nen thawhhona tha tak an nei a ti a. Kum lo kal zel turah pawh India in space sector lama a sum thawhchhuah hi apung chho telh telh dawn tih a sawi a. Thalaite tan kawng a hawng chho zel dawn a ni a ti.

He hunah hian PM Modia hian Skyroot orbital rocket hmasa ber Vikram-I a tlangzarh nghal a ni

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 128-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)

<><><>